



Ministerio Publico

Reaccion riba noticianan tocante caso Flamingo

MINISTERIO Publico a entrega apelacion contra e sentencianan cu Corte den Prome Instancia a dicta den e caso Flamingo contra e sospechosonan O.O. y E.F.E.

Hues a dicidi riba 22 di januari ultimo cu Ministerio Publico tabata den su derecho pa persigui e sospechonan den e investigacion Flamingo. Otro cu loke e sospechosonan a bisa, Hues a dicidi cu Landsrecherche y Ministerio Publico a actua conforme cu ley durante e investigacion y e persecucion di e sospechosonan.

Hues a declara E.F.E. liber di tur tres acusacion cu Ministerio Publico a pone contra dje.

O.O. tambe a wordo declara liber di algun acusacion. Sinembargo, Hues a declara O.O. culpabel di complicidad di fraude, di un intento di fraude contra Pais Aruba y di abuso di su funcion como Ministro y a condene na un castigo di 365 dia di prizon, di cual 319 dia ta condicional y e castigo maximo di trabou pa comunidad di 240 ora. Alabes O.O. a wordo priva di su derecho pa sirbi como un funcionario publico pa un periodo di 3 aña.

Den Prome Instancia O.O. a wordo priva tambe di su derecho pa vota pasivamente pa 3 aña. Pero e medida aki no por wordo impone riba dje, pasobra Hues a declara O.O. liber di corrupcion pasivo.

Ministerio Publico no ta di acuerdo cu e vrijspraaknan den e casonan aki



y tampoco cu e castigo cu a wordo impone riba O.O. y p'esey a bay den apelacion.

Mas leu, Ministerio Publico a bin ta tuma nota di noticianan cu ta sali den medionan di comunicacion tocante e caso aki. Ta purba pinta un imagen den prensa di un Ministerio Publico cu a faya y cu ta tuma decisionnan basa riba escogencianan politico y tampoco no ta duda pa ataca Fiscalnan di Husticia y Procurador-General personalmente.

Hues a determina cu Ministerio Publico a actua conforme cu ley den Flamingo y a condena e sospechoso principal den e caso aki, O.O., criminalmente y segun e mesun ley. E critica cu ta wordo expresa den medionan di comunicacion n'e momento aki ta sin fundamento y dañino pa Estado di Derecho democratico na Aruba.

Tur Fiscal di Husticia na Aruba – pero tambe na otro parti den Reino – ta forma parti di poder hudicial. Un poder cu ta independiente. No solamente Huesnan, pero tambe Fiscalnan di Husticia ta actua independiente di politica. Nan a haci un huramento of un promesa pa sirbi Pais Aruba. E ponencia den prensa cu Fiscalnan di Husticia y PG lo no ta actuando magistralmente, ta sin base y ta haci daño n'e confiansa di ciudadanonan di Aruba den gobierno en general y den Ministerio Publico en particular.

Ministerio Publico ta haci un yamada na medionan di comunicacion na Aruba pa basa nan noticia y otro declaracionnan publico riba hechonan cu a wordo verifica y caminda a haci uzo di scucha y replica y no pa plama opinionnan sin base y falsedad cu ta desinforma e pueblo di Aruba.